


# ClipArts

ClipArts sünd en Vörraat an Grafiken, de Word al mitlevert. Kiekt Se sülven!


## ClipArt infögen

- Wählt Se Menü **Grafik | Einfügen | ClipArt**.
- Rechterhand vun't Dokumentfenster geiht de Opgavenberiek op, in em is de Funkschoon **ClipArt einfügen** to sehn. ClipArts sünd avers keen to sehn; Se mööt ehr eerst söken!




- Se mööt in etwa weten, wat för'n Bild Se söcht. En Stichwoord darto geest Se in dat Feld **Text suchen** in. Denn klickt Se **Suchen**. – Wählt Se bloots einfache Stichwöör, nix Komplizeertes, süß kriggt Se amenn keen Ergebnissen!
- Alle ClipArts sünd intern mit Stichwöör utstaffeert, de dat Bild beschrievn schallt. Word söcht nu de Biller rut, op de Ehr Stichwoord todrepen deit, un wiest Se de Biller.
- Wiest Se mit de Muus op een vun de Grafiken. En Quickinfo **A** to de Stichwöör vun düsse Grafik, ehr Hööcht, Breed, Dateigrööt usw. kümmt vörtüüg.
- Dat de Grafik inföögt warrt, klickt Se einfach merrn op. Dat Bild landt in'n Text.
- Wenn avers dat Ergebnis vun de Söök Schiet is, denn klickt Se den Knoop **Ändern B** un geest anner Söökwöör in – dat köönt ok mehr as een ween!
- Se maakt den Opgavenberiek to mit dat lütte Krüz **C**.

Söcht Se sik op't best en ClipArt ut, dat en frie stahn Figur wiest, as hier de Golfspelersch. Mit düt ClipArt köönt Se nu allens öven, wat mit Grafiken mööglich is, inclusive de Ümbröök un den bunten Achtergrund.



## Grafik kopeern

Jede Grafik köönt Se ganz normaal markeern (anklicken, dat de Anfaters an'n Rahmen to sehn sünd), **Kopieren** (orr **Ausschneiden**) un **Einfügen**, so veel Se wüllt. In dat Bild rechterhand woor de Golfspelersch verveelfacht (mehrmalen **Einfügen**). De inföögten Grafiken landt licht versett blangen dat Oginaal. Jeden „klonte“ Golfspelersch kann denn enkelt wegrocken warrn.




## Grafik löschen

- Markeert Se de Grafik.
- Drückt Se de Taste **Entf**.

## Besöök in de Galerie

De Söök na de richtigen ClipArts warrt dordör vigeliensch, dat de Stichwöör deelwies ganz lusig ut't Amerikaansche översett sünd. Se köönt avers ok de ganze Galerie dörkieken, ahn Söökwöör intogeven. Klickt Se dorto heel nerrn op **Clip Organizer... D**.

De Clip Organizer geiht op. He funkscheneert so ähnlich as de Windows Explorer. Söök Se in't linke Deelfenster den Ordner „Office Sammlungen“ un wannert Se dör sin Ünnerordners.



Ok vun hier ut köönt Se jedenen Bild in den Text infögen. Bloot dat Anklicken geiht hier leider nich – Se mööt dat Menü bruken, dat an elk enkelt Bild opduckt, wenn Se op wiest.

### Mehr ClipArts in't Internet

Bloots en ringe Tall ClipArts warrt bi en Standard-Installaschoon vun Word mit op de Fastplatt schreven. Avers Microsoft höllt in't Internet grote Mengen ClipArts praas, un

wenn Se jüst online sünd, wiewess Se na ClipArts söcht, warrt düsse Online-Galerien automaatsch mit dörsöcht. Dor kümmt denn orrig wat tohoop. Best is en gawe Internetverbinning (DSL), wiewdat dat Laden vun Biller süss lang duurt.